

**BOSNA I HERCEGOVINA
FEDERACIJA BOSNE I HERCEGOVINE
SREDNJOBOSANSKI KANTON/KANTON SREDIŠNJA BOSNA
KANTONALNO TUŽILAŠTVO/KANTONALNO TUŽITELJSTVO
T R A V N I K**

Broj: T06 0 KT 0033448 23

Travnik, 05.03.2025.godine

OPĆINSKOM SUDU BUGOJNU

-Sudiji za prethodno saslušanje-

Na temelju odredbe člana 45. stav 2. tačka i) i člana 241. stav 1. Zakona o kaznenom postupku Federacije Bosne i Hercegovine, podižem

OPTUŽNICU

Potvrđena dana 04.02.2026. godine

Protiv:

- 1. MAHIR PETROVIĆ**
- 2. ISMET PETROVIĆ**
- 3. SAJMA PETROVIĆ**
- 4. ELMIN ČAUŠEVIĆ,**
- 5. MUJAGA ČOLIĆ,**

Što su:

1. Mahir Petrović

- a) Dana 31.07.2023.godine oko 03,30 sati upravljajući vozilom marke Audi A6 registarskih oznaka **, magistralnim putem M16.2 iz pravca Bugojna u pravcu Gornjeg Vakufa/Uskoplja u ulici Vrbaska u mjestu Gornji Vakuf/Uskoplje, a za vrijeme dok su se sa njim u vozilu nalazili kao saputnici Čaušević Elmin i Čolić Mujaga, postupajući suprotno odredbi člana 44. stav 1. Zakona o bezbjednosti saobraćaja na putevima BiH, krećući se nedozvoljenom brzinom od 65km/h u naseljenom mjestu, gdje je brzina kretanja ograničena na 50km/h i postupajući suprotno odredbi člana 39. stav 2. Zakona o bezbjednosti saobraćaja na putevima BiH, nije držao vozilo na dovoljnoj udaljenosti od desne ivice kolovoza, te tako upravljajući vozilom iako svjestan da može izazvati opasnost za ostale sudionike u saobraćaju ali je olako držao da do toga neće doći ili da će to moći spriječiti, u toku

kretanja, zbog nepoštivanja odredbe člana 28. stav 1. Zakona o bezbjednosti saobraćaja na putevima BiH, ostvario kontakt prednjim dijelom vozila, sa pješakom J. B., koji se u tom momentu kretao uz desnu ivicu kolovoza u istom pravcu, pri čemu je došlo do nabacivanja pješaka na poklopac motora i vjetrobransko staklo, a potom do njegovog odbacivanja na tlo, oko 30 metara od mjesta kontakta, uslijed čega je pješak zadobio teške tjelesne ozljede u vidu obimne krvne podlivenosti mekotkivnih struktura prednje strane vratne kralježnice, potpun poprečan prijelom tijela trećeg vratnog kralješka sa oštećenjem freničnog nerva te krvarenjem unutar ovog dijela vratne kralježnice i nagnječenjem leđne moždine u tom nivou, prijelom tijela IV grudnog kralješka sa pomjeranjem ulomaka, oguljotina kože desne strane čela koja se preko slijepoočnog predjela spušta na gornji desni obrazni predio sa zahvatanjem i jagodičnog predjela lica, velika oguljotina kože sa brojnim uspravno postavljenim i međusobno paralelnim ogrebotinama kože prednje vanjske, te bočne strane trbuha desno kao i donjih dijelova grudnog koša sa iste strane, brojne oguljotine kože središnjeg dijela bratka gornjeg dijela nosne piramide(sa dvije prskotine kože i prelomom nosnih kostiju sa pomjeranjem ulomaka) lijeve polovice nausnice te donje usne sa nekoliko plitkih prskotina kože, središnjeg dijela čela, stražnje strane desnog lakta i donje polovice stražnje strane desne nadlaktice, plitke prskotine kože-ogrebotine gotovo čitave površine ljevog obraznog predjela lica koje se nastavljaju na lijevu bočnu stranu vrata, koso položene u smjeru od gore i unutra prema dolje i vani, oguljotina kože promjera 6x21cm kože lijeve polovice prednje trbušne stijenke, oguljotine kože stražnje strane lijeve nadlaktice promjera 4x10cm kao i na stražnjoj strani ljevog lakta promjera 2x5cm, potpuni zatvoreni prelom donjeg okrajka desne nadlaktatne kosti, oguljotina kože prednje strane ljevog koljena promjera 2x4cm, otvoreni prelom tijela lijeve goljenične i lisne kosti sa pomjeranjem ulomaka i to donjih prema unutra od vani čineći zdjepaste defekte kože dužine oko 2cm na unutrašnjoj strani lijeve potkoljenice nešto ispod njenog središnjeg dijela, poprečno postavljena oguljotina kože prednje strane desnog koljena promjera 13x4 cm kao i oguljotina kože vanjske strane desne potkoljenice dužine 29cm i širine 8,5cm, masivan krvni podliv kože na unutrašnjoj strani desne potkoljenice promjera 11x18cm, prelom ljsuke desne slijepoočne kosti koji se širi do dijela klinaste kosti na bazi lobanje, izliv krvi u stražnju lobanjsku duplju, prelomi I-V ljevog rebra uz rascijep vanjskog lista poplućnice i međurebarnih krvnih sudova u nivou prvog rebra, te prelomi I-III rebra desno sa rascijepima vanjskog lista poplućnice i međurebarnih krvnih sudova u nivou prvog rebra uz izliv oko 900ml tečne i dijelom zgrušane krvi u prostor lijeve i oko 700ml tečne i dijelom zgrušane krvi u prostor desne grudne duplje i sagitalni rascijep čahure i površnih dijelova tkiva dužine oko 14cm na gornjoj strani desnog režnja jetre uspravno postavljenim i međusobno paralelnim ogrebotinama kože prednje vanjske uslijed kojih je ubrzo i preminuo,

- b) Dana 31.07.2023.godine oko 03,30 sati, nakon što je upravljajući vozilom marke Audi A6 registarskih oznaka ***, magistralnim putem M16.2 iz pravca Bugojna u pravcu Gornjeg Vakufa/Uskoplja u ulici Vrbaska u mjestu Gornji Vakuf/Uskoplje, a za vrijeme dok su se sa njim u vozilu nalazili kao saputnici Čaušević Elmin i Čolić Mujaga, ostvario kontakt sa pješakom

oštećenim J. B., iako svjestan da radnje koje poduzima su zabranjene i mogu prouzrokovati štetne posljedice i htijući to, bez zaustavljanja i pružanja medicinske pomoći ili poziva nadležnim službama da puže pomoć osobi sa kojom je ostvario kontakt, i htijući to, zajedno sa saputnicima udaljio sa lica mjesta nezgode ostavivši tijelo stradalog na mjestu nezgode, nakon čega je došao do kuće te zajedno sa roditeljima ocem Ismetom Petrovićem i majkom Sajmom Petrović, te saputnicima Elminom Čauševićem i Mujagom Čolićem koji su bili prisutni događaju, radi spriječavanja dokazivanja dogovorio i realizovao uklanjanje tragova, prikrivanje krivičnoga djela i nabavku oštećenih dijelova vozila, radi njihove zamjene, i nemogućnosti povezivanja njegovoga vozila sa predmetnom nezgodom,

dakle, nehatnim postupanjem prouzrokovao saobraćajnu nezgodu u kojoj je jedno lice smrtno stradalo te ostavio bez pomoći osobu koju je ozlijedio.

Čime je počinio krivično djelo „Teška krivična djela protiv sigurnosti javnog prometa“ iz člana 336. stav 4. u vezi sa članom 332. stav 3. KZ F BiH i „Neukazivanje pomoći osobi ozlijeđenoj u prometnoj nezgodi“ iz člana 337. stav 1. KZ F BiH.

2. Ismet Petrović

Dana 31.07.2023.godine u Gornjem Vakufu Uskoplju, spriječio dokazivanje u sudskom postupku, iako svjestan da je takvo postupanje zabranjeno, i htijući to, tako što je znajući da je njegov sin Mahir Petrović koji je došao kući sa oštećenim vozilom, prouzrokovao prometnu nezgodu u kojoj je jedna osoba smrtno stradala, svjestan da zbog navedenoga mora biti proveden sudski postupak, pa kako bi isti onemogućio ili otežao i spriječio dokazivanje, nakon dogovora sa prisutnima njegovim sinom Mahirom Petrovićem, njegovom suprugom Sajmom Petrović, te Elminom Čauševićem i Mujagom Čolićem, da se o nezgodi nikome ništa ne govori, te je nakon čišćenja tragova iz vozila, zajedno sa svojom suprugom Sajmom Petrović, skrio vozilo u njihovoj garaži te se istoga dana zajedno sa svojom suprugom uputio u pravcu Viteza i Busovače kako bi pronašli zamjenske dijelove, te u Busovači, na auto otpadu „Andrija“ kupili dijelove za vozilo Audi A6 kojim je njihov sin Mahir Petrović prouzrokovao prometnu nezgodu te iste u narednom periodu i zamijenio a oštećene dijelove uništio i skrio, odnosno zakopao u blizini njihove kuće,

dakle, s ciljem da spriječi ili oteža dokazivanje u sudskom postupku sakrio uništio predmet koji služi za dokazivanje.

Čime je počinio krivično djelo „Spriječavanje dokazivanja“ iz člana 349. stav 2. KZ F BiH.

3. Sajma Petrović

Dana 31.07.2023.godine u Gornjem Vakufu-Uskoplju, spriječila dokazivanje u sudskom postupku, iako svjesna da je takvo postupanje zabranjeno, i htijući to, tako što je, znajući da je njen sin Mahir Petrović koji je došao kući sa oštećenim vozilom, prouzrokovao prometnu nezgodu u kojoj je jedna osoba smrtno stradala, svjesna da zbog navedenoga mora biti proveden sudski postupak, pa kako bi isti onemogućila ili otežala i spriječila dokazivanje, nakon dogovora sa prisutnima, njenim sinom Mahirom Petrovićem, njenim suprugom Ismetom Petrović, te Elminom Čauševićem i Mujagom Čolićem, da se o nezgodi nikome ništa ne govori, nakon čišćenja tragova iz vozila, zajedno sa svojim suprugom skrila vozilo u njihovoj garaži, a potom istog dana zajedno sa svojom suprugom Ismetom Petrović se uputila u pravcu Viteza i Busovače kako bi pronašli zamjenske dijelove, te u Busovači, na auto otpadu „Andrija“ kupili dijelove za vozilo Audi A6 kojim je njihov sin Mahir Petrović prouzrokovao prometnu nezgodu a koje je njen suprug u narednom periodu i zamijenio, a oštećene dijelove uništio i skrio, odnosno zakopao u blizini njihove kuće,

dakle, s ciljem da spriječi ili oteža dokazivanje u sudskom postupku sakrila uništila predmet koji služi dokazivanje.

Čime je počinila krivično djelo „Spriječavanje dokazivanja“ iz člana 349. stav 2. KZ F BiH.

4. Elmin Čaušević

- a) Dana 31.07.2023.godine u Gornjem Vakufu Uskoplju, nije pružio pomoć osobi koja je bila u direktnoj životnoj opasnosti te pomogao učiniocu poslije učinjenja krivičnog djela za koje se može izreći kazna od 5 godina zatvora i teža, na način da je nakon što je u 03,32 sata na magistralnom putu M16.2 u ulici Vrbaska u mjestu Gornji Vakuf/Uskoplje, nalazeći se u pmv Audi A6 registarskih oznaka ***, kojim je upravljao Mahir Petrović, na magistralnom putu M16.2 iz pravca Bugojna u pravcu Gornjeg Vakufa/Uskoplja, a gdje se još nalazio i Čolić Mujaga, pa nakon što je vozač Mahir Petrović prouzrokovao prometnu nezgodu ostvarivši kontakt sa pješakom J. B., pri čemu je pješak smrtno stradao, pa iako svjestan svojih postupaka i znajući šta se desilo, i htijući to, iako je to mogao učiniti bez opasnosti za svoj život, nije pružio pomoć osobi koja se nalazila u direktnoj životnoj opasnosti, odnosno oštećenom Jozi Batiniću koji je uslijed zadobivenih ozljeda preminuo, nego je zajedno sa vozačem i drugim saputnikom pobjegao sa mjesta nezgode,
- b) Dana 31.07.2023.godine u Gornjem Vakufu Uskoplju, a nakon što je kao saputnik u pmv Audi A6 reg. Oznaka***, kojim je upravljao Mahir Petrović, a u kom vozilu je još bio i Mujaga Čolić, učestvovao u saobraćajnoj nezgodi, te pošto se nisu zaustavili radi pružanja pomoći povrijeđenom kada su došli do kuće u kojoj osumnjičeni Mahir Petrović živi sa roditeljima i nakon što su i roditelje Mahira Petrovića upoznali o događaju, dogovorili da se o događaju nikome ne govori, te ponovo svjestan svojih postupaka i htijući to, savjetovao da se događaj ne prijavljuje, a potom ne prijavljujući događaj nadležnim institucijama i ne govoreći nikome, osim srodnicima Mahira Petrovića o predmetnom događaju, pomogao da ne bude otkriven u vrijeme kada se događaj zbio,

dakle, nije pružio pomoć osobi koja je bila u direktnoj životnoj opasnosti i pomogao učiniocu kaznenog djela da ne bude otkriven.

Čime je počinio krivično djelo „Nepružanje pomoći“ iz člana 175. stav 3. u vezi stava 1. KZ F BiH i krivično djelo „Pomoć učinitelju poslije učinjenog krivičnog djela“ iz člana 345. stav 2. u vezi stava 1. KZ F BiH.

5. Mujaga Čolić

- a) Dana 31.07.2023.godine u Gornjem Vakufu Uskoplju, nije pružio pomoć osobi koja je bila u direktnoj životnoj opasnosti te pomogao učiniocu poslije učinjenja krivičnog djela za koje se može izreći kazna od 5 godina zatvora i teža, na način da je nakon što je u 03,32 sata na magistralnom putu M16.2 u ulici Vrbaska u mjestu Gornji Vakuf/Uskoplje, nalazeći se u pmv Audi A6 registarskih oznaka***, kojim je upravljao Mahir Petrović, na magistralnom putu M16.2 iz pravca Bugojna u pravcu Gornjeg Vakufa/Uskoplja, a gdje se još nalazio i Elmin Čaušević, pa nakon što je vozač Mahir Petrović prouzrokovao prometnu nezgodu ostvarivši kontakt sa pješakom J. B., pri čemu je pješak smrtno stradao, pa iako svjestan i znajući šta se desilo, i htijući to, iako je to mogao učiniti bez opasnosti za svoj život, nije pružio pomoć osobi koja se nalazila u direktnoj životnoj opasnosti, odnosno oštećenom J.B. koji je uslijed zadobivenih ozljeda preminuo, nego je zajedno sa vozačem i drugim saputnikom pobjegao sa mjesta nezgode,
- b) Dana 31.07.2023.godine u Gornjem Vakufu Uskoplju, a nakon što je kao saputnik u pmv Audi A6 reg. Oznaka ***, kojim je upravljao Mahir Petrović, a u kom vozilu je još bio i Elmin Čaušević, učestvovao u saobraćajnoj nezgodi, te pošto se nisu zaustavili radi pružanja pomoći povrijeđenom kada su došli do kuće u kojoj osumnjičeni Mahir Petrović živi sa roditeljima i nakon što su i roditelje Mahira Petrovića upoznali o događaju, dogovorili da se o događaju nikome ne govori, te ponovo svjestan svojih postupaka i htijući to, savjetovao da se događaj ne prijavljuje, a potom ne prijavljujući događaj nadležnim institucijama i ne govoreći nikome, osim srodnicima Mahira Petrovića o predmetnom događaju, pomogao da ne bude otkriven u vrijeme kada se događaj zbio,

dakle, nije pružio pomoć osobi koja je bila u direktnoj životnoj opasnosti i pomogao učiniocu kaznenog djela da ne bude otkriven.

Čime je počinio krivično djelo „Nepružanje pomoći“ iz člana 175. stav 3. u vezi stava 1. KZ F BiH i krivično djelo „Pomoć učinitelju poslije učinjenog krivičnog djela“ iz člana 345. stav 2. u vezi stava 1. KZ F BiH.

KANTONALNI TUŽILAC

Poštovani predstavnici medija, molimo Vas da prilikom prenošenja vijesti imate u vidu da osobe, na koje se odnose vijesti i informacije iz Kantonalnog tužilaštva Travnik, imaju status osumnjičenih ili optuženih osoba. Podsjećamo na načelo presumpcije nevinosti koje definiše da se niko ne može smatrati krivim dok mu se krivica ne dokaže pravosnažnom presudom.